

LISTOVI GRAČANIČOG KALENDARA OD 31.5.2012. DO 27.11.2012.

Dr. sc. Omer Hamzić



31. 5. 2012.

PROMOCIJA HISTORIJSKE MONOGRAFIJE "GRAČANICA
I OKOLINA U PERIODU IZMEĐU DVA SVJETSKA RATA –
PRAVNO-POLITIČKI I DRUŠTVENO-EKONOMSKI RAZVOJ"
DOC. DR. OMERA HAMZIĆA

Promociju je organizovao Bosanski kulturni centar u sklopu kulturne manifestacije "Dani Gračanice", koja se organizuje svake godine u povodu Dana odbrane i Dana općine Gračanica. Radi se o još jednoj temeljnoj "historijskoj knjizi" o Gračanici, u kojoj su u velikoj mjeri sadržani rezultati istraživanja iz doktorske disertacije "Pravno-politički i društveno-ekonomski položaj Gračaničkog sreza u okviru Tuzlanske oblasti i Vrbaske banovine u periodu 1918.–1941.godine", koju je autor odbranio na Pravnom fakultetu u Zenici, 2008. godine. U prepunoj Sali Muzičke škole u Gračanici, knjigu su Gračanlijama predstavili prof. dr. Salih Jalimam, prof. dr. Šaban Nurić i prof. dr. Omer Ibrahimagić. U svom izlaganju prof. Ibrahimagić je posebno apostrofirao veliki doprinos autora izučavanju lokalne historiografije, ne samo u mnoštvu objavljenih radova i knjiga, već i kroz Časopis za kulturnu historiju "Gračanički glasnik", koji vodi i uređuje od njegovog osnivanja, 1996., do danas. U tom smislu, riječi

zahvalnosti u ime građana općine Gračanica autoru je uputio i općinski načelnik Nusret Helić.

31. 5. 2012.

40. SJEDNICA OPĆINSKOG VIJEĆA: OTVORENA RASPRAVA O UMREŽAVANJU, ODNOSNO RACIONALIZACIJI ŠKOLSKE MREŽE NA PODRUČJU TK

Iako je najviše pažnje, po pravilu i najviše vremena i zanimanja privukla Odluka o ovogodišnjim općinskim priznanjima, koja ni ovoga puta nije usvojena jednoglasno, prije samog utvrđivanja dnevnog reda, Klub vijećnika SDA zahtijevao je da se na dnevni red stavi i pitanje javne rasprave o takozvanom umrežavanju, odnosno racionalizaciji školske mreže na području Tuzlanskog kantona. Nakon žučne rasprave, postignut je kompromis: da se to pitanje stavi na dnevni red, a da se rasprava o njemu, nakon odgovarajućih priprema, obavi na vanrednoj sjednici, koja je istovremeno i zakazana za 4. 6. ove godine. Riječ je, inače, o materijalu Vlade TK u kojem je predviđena racionalizacija školske mreže na Kantona, ukidanje ili objedinjavanje nekih škola bez dovoljno đaka, što je uzburkalo lokalnu javnost prije nego što je rasprava o tom pitanju i otvorena.

Vijećnici su bez mnogo rasprave usvojili Odluku o pristupanju izradi Regulacionog plana "Centar" u Gračanici, kojom se otvara postupak donošenja tog važnog urbanističkog dokumenta za narednih deset godina. Osim ove, na sjednici su usvojene dvije informacije i nekoliko izvještaja o radu javnih preduzeća i ustanova u 2011. Između ostalih, o radu i vršenju općinskih inspekcija, o realizaciji akcionog plana socijalnog uključivanja u sistem socijalne/dječje zaštite u odnosu na oblast

vodosnabdijevanja u općini Gračanica, te izvještaji o radu Općinskog pravobranilaštva, JP "Vodovod i kanalizacija", JP "Komus", JP Veterinarska stanica, Izvještaj o stanju poljoprivrede i privrednim poticajima i konačno, Izvještaj o stanju zaposlenosti i nezaposlenosti i stvarnim potrebama kadrova u privredi na općini Gračanica.

2. 6. 2012.

DAN OPĆINE, SVEČANA AKADEMIJA, DODJELA PRIZNANJA

Nakon svečanog referata i prigodnog kulturno-umjetničkog programa, dodijeljena su tradicionalna godišnja općinska priznanja. Dobitnici *Zlatne plakete* su: Goethe institut BiH i "Helioplast" d.d. Gračanica, *Zlatna značka* dodijeljena je Haliđović Hazemi iz Pribave, Mešić Hasibu iz Donje Orahovice i Pjanić Safetu iz Gračanice, dok je posebno općinsko priznanje *Počasni građanin* općine Gračanica dodijeljeno Leopoldu Marcolongu (Italija).

2. 6. 2012.

DAN OPĆINE, OTVARANJE ULICE BOSANSKIH KRALJEVA

Upriličeno je nakon svečane sjednice u prisustvu brojnih građana i gostiju. Radi se o vrlo zahtjevnom projektu, koji je pored asfaltiranja i uređenja ulice, obuhvatio i rekonstrukciju vodovodnih i kanalizacionih sistema duž ulice. U ovaj projekat uloženo je oko 200.000 KM budžetskih sredstava. Vrpcu su presjekli načelnik Općine Gračanica Nusret Helić i predsjednik Vlade TK Sead Čaušević.

4. 6. 2012.

VANREDNA SJEDNICA OPĆINSKOG VIJEĆA: UMREŽITI ILI ZAMRSITI PROBLEME U OSNOVOM OBRAZOVANJU NA PODRUČJU TK

Sjednica je održana po zaključku sa prethodne, 40. redovne, na kojoj su vijećnici "ničim izazvani" raspravljali o materijalu koji im niko nije ni uputio i o problematici za koju nisu ni nadležni – iako se itekako tiče svih građana Kantona. Radi se o potrebi racionalizacije školske mreže i elaboratu koji je izazvao još veće probleme u ovoj oblasti–svojom nestručnošću nedosljednošću i velikim stepenom volun-tarizma. Sve se konačno ispolitiziralo i došlo "ko kec na desetku" na samom početku takozvane političke krize i "istjerivanja" SDA iz aktuelne vlasti na svim nivoima. Zaključak je da se materijal odbije iako javna rasprava o njemu zvanično nije ni otvorena, što je jedan od mnogih apsurdna na ovdašnjoj političkoj sceni.

19. 6. 2002.

UMRO ISTAKNUTI GRAČANIČKI PRIVREDNIK SULJO DEVEDŽIĆ

Jedan je od posljednjih "velikih socijalističkih direktora" gračaničkog lokalnog miljea, prvo uspješan učitelj, pa direktor gračaničke niže gimnazije (sadašnja Druga osnovna škola), zatim direktor nekoliko većih privrednih preduzeća u Gračanici. Rođen je 1923. godine u Lukavici, potiče iz tamošnje ulemanske porodice, koja je iznjedrila više istaknutih imama, učitelja, inženjera i intelektualaca–koji su na mnogim poljima postigli, a i danas postižu izvanredne uspjehe. Posljednje godine života (do prije dvije godine) proveo je na dužnosti predsjednika Udruženja antifasista i boraca narodnooslobodilačkog rata (1941. – 1945.) Gračanica, bio je aktivan u lokalnom udruženju antifasista itd. Jedan je od inicijatora za podizanje spomen-biste Josipu Brozu Titu u centralnom parku u Gračanici.

21. 6. 2002.

GRAČANIČKI GLASNIK: PREDSTAVLJENA TRIEDESETTROJKA

Sa ovim brojem Časopis ulazi u 17. godinu svog kontinuiranog izlaženja, te u tom smislu uskoro stiče svojevrsno puno-ljetstvo, što je prava rijetkost u periodici uopće, a posebno u izdanjima ovakvog kulturološkog usmjerenja. U proteklim godinama ispisano je preko 4000 stranica teksta iz raznih oblasti, počevši od historiofije i kulturne historije, pa do savremenih i aktuelnih društvenih tema, te priloga iz književnosti i umjetnosti. Ovaj broj posvećen je 20-toj godišnjici početka agresije i rata za BiH (1992.–1995. godina), na 270 stranica donosi obilje tekstova iz bliže i dalje prošlosti... Izdvajamo četiri kratke priče koje je za ovaj broj napisala poznata bosanskohercegovačka književnica Nura Bazdulj Hubijar, likovne priloge rahm. Bakira Maglajlije, te dva dodatka. U prvom su predstavljeni sljedeći doktori nauka s područja Gračanice: Mevlida Đuvic i Lejla Žunić. Drugi dodatak je, ustvari, Zbornik radova sa naučnog skupa "Život i djelo Muhameda Tajjiba Okića", koji je održan u Gračanici 16. 09. 2011.

24. 6. 2012.

UMRO SEZAHIJA DERVIŠEFENDIĆ, ISTAKNUTI GRAČANIČKI POLJOPRIVREDNI STRUČNJAK SOCIJALISTIČKOG PERIODA

Rođen je prije 90 godina u uglednoj i imućnoj gračaničkoj porodici Dervišefendića, prvi je školovani poljoprivredni tehničar iz domaće sredine, koji se odmah poslije Drugog svjetskog rata aktivno uključio u unapređenje agrara i stvaranje boljih uslova života na selu. Odlikovao se, ne samo stručnošću, već i druželjubivošću, optimizmom i vjerom u razne projekte

unapređenja poljoprivrede na području općine Gračanica, od kojih su mnogi, ne njegovom voljom, a još manje krivicom, nažalost, završavali neuspješno. Kao poljoprivredni stručnjak bio je rukovodilac, direktor i tehnički direktor više gračaničkih zadružnih organizacija i poljoprivrednih dobara.

28. 6. 2012.

41. SJEDNICA OPĆINSKOG VIJEĆA: ODLUKE O NAKNADAMA ZA POSTAVLJANJE I POPRAVAK PODZEMNIH INSTALACIJA I PITANJA ĐAČKIH I STUDENTSKIH STIPENDIJA...

... bile su prve tačke dnevnog reda ove sjednice. Tako će svako pravno i fizičko lice, koje "radi ostvarivanja svojih poslovnih interesa ima potrebe za postavljanjem i popravkom podzemnih i nadzemnih instalacija na javnim površinama" (trotoari, trgovi, parking prostori, parkovi) biti obavezno podnijeti pismeni zahtjev za odobrenje nadležnoj službi, koja će mu utvrditi visinu naknade prema kriterijima iz ove Odluke (građevinska zona, dužina i značaj instalacija itd.) Po drugoj odluci Općina će u školskoj 2012/2013. godini dodijeliti 14 stipendija "učenicima generacije", 30 stipendija (učenicima 10, studentima 20) pripadnicima boračke populacije, 12 stipendija nadarenim učenicima i studentima (po 6), 10 stipendija učenicima i studentima u deficitarnim zanimanjima (po pet), 14 stipendija učenicima i studentima slabijeg imovnog stanja (po 7). Na ime stipendije učenicima će se isplatiti 600, a studentima 1.200 KM za školsku godinu. Trećom odlukom utvrđeni su uslovi, kriteriji i postupak dodjele navedenih stipendija.


Od informacija i izvještaja koji su bili na dnevnom redu ove sjednice, pažnju pri-

vlače podaci iz Izvještaja o realizaciji Programa kapitalnih investicija Općine Gračanica u 2011. godinu u kojem se navodi da je u te projekte uloženo 3.950.305 KM, odnosno 17,9% od ukupno planiranog obima ulaganja u periodu 2010. – 2014. godina (planirana ulaganja iznose 22.065.026 KM), što se, kako se navodi, s obzirom na opće uslove, može smatrati uspješnim. Najveća ulaganja izvršena su u projekat toplifikacije i deminiranja, zatim u vodovode i kanalizacione mreže, te putnu infrastrukturu, javnu rasvjetu itd.

30. 6. 2012.

OTVORENA DŽAMIJA U DŽEMATU GOLAČI – U MALEŠIĆIMA

Stvarajući sebi bolje uslove za vjerski život, džematlije Golača dogradili su i proširili postojeću zgradu mesdžida i uz nju podigli munaru sa ostalim pratećim sadržajima. Dobrodošlicu visokim gostima i brojnim vjernicima poželio je mjesni imam Miralem ef. Golać, te podsjetio prisutne kako je na mjestu ove nove džamije, 1937.



godine, sagrađen drveni mekteb u kome su se klanjali noćni namazi i održavala vjerska pouka, a od 1942. do 1982. godine, dakle punih 40 godina, imamske dužnosti u tom džematu obavljao je njegov djed Hajdar ef. Golać, u narodu poznatiji kao Hafiz Golać.

Džamija je izgrađena sredstvima džematlija Golaća, uz nesebičnu pomoć džemata Malešića, ali i drugih mnogobrojnih donatora. U gradnju džamije uloženo je oko 130.000 KM. Izgrađeno je 160 metara prostora za klanjanje i gasulhanu. Uz to, u sklopu vakufske kuće, osposobljena je i mektebska učionica ("Preporod", br 14/976, od 15. 07. 2012., str. 16)

30. 8. 2012.

42. SJEDNICA OPĆINSKOG VIJEĆA:

USVOJEN PROGRAM KAPITALNIH

INVESTICIJA OPĆINE GRAČANICA 2010. –

2014. – AŽURIRANJE U 2012.

Iako, zbog približavanja lokalnih izbora (ovo je predzadnja sjednica Općinskog vijeća), ova tačka dnevnog reda nije pobudila skoro nikakvu pažnju vijećnika. Ovaj dokument je od važnosti prije svega zbog obaveze ažuriranja tog programa svake godine i usklađivanja obima kapitalnih ulaganja sa realnim mogućnostima općinskog budžeta. Svi planirani projekti za 2012., kao je konstatovano, bit će realizovani prema Programu kapitalnih investicija za 2012., koji je usklađen sa usvojenim Budžetom. Radi se ukupno o 62 manja ili veća projekta u ukupnoj vrijednosti od 4.170.300 KM (infrastruktura, komunalije, klizišta, deminiranje, sport, kultura itd.).

Što se tiče interesovanja vijećnika, isto se može reći i za Lokalni akcioni plan zaštite životne sredine općine Gračanica 2012. – 2017. (LEAP), koji je usvojen tako reći bez diskusije. U programu je opisano

stanje životne sredine, dana vizija daljeg razvoja u toj oblasti, te akcioni plan, praćen nizom podataka i parametara. Ovaj dokument je osnova i uslov za apliciranje općine Gračanica na sredstva iz raznih domaćih i stranih ekoloških fondova.

1. 9. 2012.

PROMOVISANA HISTORIJSKA

MONOGRAFIJA "GORNJA ORAHOVICA

NEKADA I SADA" AUTORA EDINA ŠAKOVIĆA

I OMERA HAMZIĆA

Rijetko je neki događaj okupio toliko mještana Gornje Orahovice, rijetko je neka knjiga imala toliko posjetilaca na svojoj promociji, pogotovo u posljednje vrijeme. Radi se, uistinu, o jednom historijskom događaju za Gornju Orahovicu, o pisanom biljevu takvih dimenzija koji se neće moći mimoći u bilo kakvom ozbiljnom govoru o ovom naselju, "od sada do vječnosti". Veličina i značaj ovakvih poduhvata ne može se mjeriti iz sadašnjosti. Ali je činjenica da u narednom periodu niko ništa neće moći reći, niti ozbiljno napisati o Gornjoj Orahovici, a da ne zaviri u ovu njihovu knjigu, reako je, između ostalog, općinski načelnik Nusret Helić, u svom obraćanju na promociji. Poslije Lukavice i Dobrovaca, ovo je treća po redu historijska monografija, na općini Gračanica, urađena po strogo naučnoj i stručnoj metodologiji, nastala kao rezultat stvaralačkog i istraživačkog napora ekipe, okupljene oko "Gračaničkog glasnika". "Ponosan sam što sam bio u prilici da podržavam ove projekte, kojima se može pohvaliti rijetko koja općina, grad ili naselje u Bosni i Hercegovini", rekao je načelnik Helić, upućujući čestitke autorima, ali i riječi zahvalnosti ovdašnjem privredniku Vehidu Osmanoviću, koji je inicirao i u potpunosti isfinansirao ovaj

projekat. Nije mogao darovati bolji, vredniji i trajniji vakuf svome rodnom selu od ove knjige. Iako je i do sada bio donator i podržavao mnoge kulturne i humanitarne projekte širom Bosne i Hercegovine, ovo je, ipak bio njegov najvrijedniji vakuf, možda ne po visini ulaganja, koliko po značaju i trajanju u ovom vremenu i prostoru.

4. 9. 2012.

INTERNACIONALNA LIGA HUMANISTA – LIGA ZA MIR I SVJETSKO JEDINSTVO – VISOKO PRIZNANJE NAČELNIKU OPĆINE GRAČANICA NUSRETU HELIĆU

Radi se o Zlatnoj povelji “Lider lokalne samouprave decenije”, koja mu je dodijeljena za postignute rezultate u radu lokalne samouprave u skladu sa Evropskom poveljom. Ceremonija dodjele obavljena je u prepunoj Sali Bosanskog kulturnog centra u prisustvu velikog broja građana I gostiju, među kojima je bilo I nekoliko istaknutih imena Internacionalne lige humanista–Lige za mir i svijetsko jedinstve–Mirko Pejanović, Tarik Kupusović, Zdravko Šurlan, Dervo Sejdić, Bruno Bojić i drugi. U kulturno umjetničkom programu su sjajan nastup imale pijanistica prof.Dženana Kurtić, Azijada Mulalić i Elma Mujaković.

5. 9. 2012.

ZAVRŠENA GRADNJA OSNOVNE ŠKOLE U PRIBAVI

Gradnja je počela prije 13 godina, svečanim polaganjem kamena temeljca koji je više puta zarastao u travu, pa ponovo “postavljan” – zavisno od lokalnih političkih “kretanja”, izbora itd. Do sada su djeca iz tog sela pohađala nastavu u Donjoj Lohinji i Drugoj osnovnoj školi u Gračanici (prije rata OŠ “Mitar Trifunović Učo”). Od početaka ove školske godine nastavu će pohađati u moderno oprem-

ljenom novosagrađenom objektu, od ukupno 554 kvadratna metra sa 4 učionice, prostorijom za tjelesni odgoj i zabavu, te još jednom prostorijom za ostale nastavne aktivnosti, lijepo uređenim dvorištem itd. U gradnju objekta, kako je na otvaranju rekao direktor Druge osnovne škole Ifad Kruškić (pri kojoj će biti i novootvoreno područno odjeljnje u Pribavi), uloženo je oko 550.000 KM, od čega su sredstva Vlade TK 325.694 KM, prikupljena sredstva Pribavljana oko 80.000 i općine oko 40.000 KM. Iako su Pribavljani jako dugo čekali “svoju školu”, najvažnije je da od sada njihova djeca neće morati putovati pješice ili autobusima do gradske škole ili škole u Donjoj Lohinji vrlo prometnim i za male pješake opasnim saobraćajnicama.

07. 09. 2012.

KOMPANIJA “ŠIRBEGOVIĆ”: POTPISAN UGOVOR ZA ISPORUKU ČELIČNIH KONSTRUKCIJA U ALŽIRU

Kompanija “Širbegović” iz Gračanice je potpisala milionski ugovor sa *Petrolinvest* dd iz Sarajeva o proizvodnji i isporuci čelične konstrukcije za postrojenje DEG u alžirskom gradu Hassi R'Melu. Partnerstvo domaćih kompanija na velikim ili inostranim poslovima je izvrstan način upošljavanja kapaciteta bh. kompanija. (pres Kompanije).

24. 09. 2012.

ASFALT U FAZLIJAMA (BABIĆI)

U mjesnoj zajednici Babići, u zaseoku Fazlije, svečano je puštena u upotrebu dionica novoasfaltiranog puta u dužini od 350 metara. Ukupna investicija iznosila je 52.000 KM. Većinu novca obezbjedila je Općina iz budžeta a dijelom su u financiranju učestvovali i mještani Babića.

26. 09. 2012.

43. – POSLJEDNJA SJEDNICA OPĆINSKOG VIJEĆA U OVOM MANDATU–ODBIJAJUĆI DA STAVE NA DNEVNI RED I DA RAZMATRAJU IZVJEŠTAJ O RADU OPĆINSKOG VIJEĆA, ŠTO MOŽE BITI FENOMEN U PARLAMENTARNOJ PRAKSI, VIJEĆNICI SAMI SEBI DALI NAJBOLJU OCJENU

Trebalo je da bude rutinska i oprostajna – sa svega dvije tačke dnevnog reda, a ipak nije. Prva tačka bila je Odluka o obrazovanju stalnih radnih tijela Općinskog vijeća Gračanica, a druga, Odluka o izmjeni Odluke o osnivanju Opće bolnice Gračanica. Dok je druga tačka imala smisla i potrebe jer se ticala nekih formalnih izmjena u osnivačkom aktu Opće bolnice i usvojena bez problema, oko prve je bilo dosta rasprave koju je inicirao vijećnik LDP Muharem Musić (koji je 2/3 mandata bio i predsjedavajući ovog vijeća, a zamijenio ga je Edin Ibrišević, SDU – po nekom ranijem stranačkom dogovoru i po postupku, koji će, vjerovatno završiti na sudu. Iako je bilo krajnje besmisleno ovu tačku stavljati na dnevni red posljednje sjednice Općinskog vijeća i krojiti strukturu radnih tijela onom vijeću koje će biti tek izabrano 7. oktobra ove godine, niko od vijećnika nije tražio “skidanje” te tačke sa dnevnog reda. Ali kad je već “postavljena”, Musić je na tu odluku dao više primjedbi koje uglavnom nisu prihvaćene i odluka je, kao takva usvojena većinom glasova prisutnih vijećnika. Međutim, po tome se neće pamtiti ova sjednica i ovo Vijeće. Ono će biti upamćeno po tome što je, još ranije, odbilo inicijativu istog vijećnika da se na dnevni red neke od posljednjih sjednica postavi Izvještaj o radu i da vijećnici makar formalno (hajde, i simbolično) kroz taj izvje-

štaj polože račun svojim biračima. Ni inicijativa istog vijećnika da se izvještaj o radu Vijeća razmatra na posebnoj sjednici, koja bi se zakazala u nekom terminu do izbora, nije prihvaćena od strane većine, a da niko nije ni spomenuo razloge zbog kojih se pravi tako nepotreban presedan.. Tako su na najbolji način i dali ocjenu o svom radu. Znači, radili su “nako...”

7. 10. 2012.

PETI POSLIJERATNI LOKALNI IZBORI–U GRAČANICI SVE U REDU, UGLAVNOM,

...ali će ovi izbori biti upamćeni po najprljavijoj do sada kampanji, po uvredljivim grafitima ispisanim po zidovima i tarabama, javnim i privatnim objektima, čija sadržina po skaradnosti i primitivluku ne može stati u ovaj tekst... Sve je to bilo sračunato i usmjereno protiv kandidata SDP Nusreta Helića Dase (ujedno i aktuelnog načelnika). Od ukupno upisanih 40721 birača, na 60 biračkih mjesta glasalo je 26624 ili 65,46%. Procjena je da je ovo solidna izlaznost birača imajuću u vidu općepolitičke prilike u kojima su provedeni ovogodišnji izbori. Za mjesto načelnika nadmetali su se Nusret Helić (SDP), Hazim Vikalo (SDA) i Vezir Basić (SBB), a za “stolice” u općinskom vijeću 8 političkih partija. Osim nekoliko prijavljenih incidenata u Lukavici, Sokolu i još nekim mjestima, izbori su protekli, uglavnom, u zakonskim okvirima i bez većih problema – imajući u vidu oštrinu kampanje koja im je prethodila.

1. 11. 2012.

IZLOŽBA “KULTURNO PAMĆENJE – BLAGO KOJE NESTAJE” U GRAČANICI

Ozložbu ovako znakovitog i provokativnog naziva priredila je u organizovala Komisija za očuvanje nacionalnih spome-

nika BiH u saradnji sa Zavodom za zaštitu i korištenje kulturno-historijskog i prirodnog naslijeđa Tuzlanskog kantona. Izložba obuhvata oko 50 panoa s fotografijama nacionalnih spomenika BiH, koje uz prateći tekst oslikavaju svu ljepotu i neprocjenjivu vrijednost bh. kulturne baštine na prostoru 18 općina sjeveroistočne regije BiH: Banovića, Bijeljine, Brčkog, Gračanice, Gradačca, Kladnja, Lukavca, Milića, Modriče, Odžaka, Orašja, Petrova, Srebrenice, Srebrenika, Šamca, Šekovića, Tuzle, Zvornika...

Izložba je izazvala zapažen interes i u Gračanici kao i u ostalim općinama regije. Dobro bi bilo ako bi samo potakla na razmišljanje one koji su odgovorni što nam prezentirano blago nestaje takoreći pred našim očima.



27. 11. 2012.

KONSTITUIRAJUĆA SJEDNICA OPĆINSKOG VIJEĆA GRAČANICA – OVAJ MANDAT SA ČELNICIMA IZ PROŠLOG MANDATA

To je bila volja takozvane parlamentarne većine koju je, nakon višednevnih konsultacija uspio okupiti lokalni SDP. Sa svojih 11 mandata, tri mandata BPS i po jednim mandatom SDU, LDS i SBB, raspolagat će sa 17 od ukupno 30 „ruku“ u Općinskom vijeću. To će mu biti dovoljno da sa „svojim“ načelnikom, „diktira tempo općinske politike“ i u naredne četiri godine – naravno, ukoliko, se dotle ova koalicija održi. U vijećničkoj „manjini“ ostaje SDA sa 11 mandata i sa po jednim mandatom BOSS i Naša stranka.

Sa navednih 17 glasova „za“ funkciju predsjedavajućeg i zamjenika predsjedavajućeg Općinskog vijeća obavljat će (profesionalno) i dalje dosadašnji predsjedavajući Edin Ibrišević (SDU) i njegov (opet) dosadašnji zamjenik Sead Gazibegović (SDP), volonterski.

Prijedlog vijećnika i kandidata za predsjedavajućeg Naše stranke Mirsada Čamdžića (dat na samoj sjednici) da se ta funkcija deprofesionalizuje i da se vijećnički paušali smanji za 50% (što je ušteda u Općinskom budžetu za četiri godine oko 400.000 KM) nije ni uzet u razmatranje – iz poslovničko-proceduralnih razloga.

Inače, Vijeće se konstituisalo u novoj sali za sjednice, koja je namjenski izgrađena i opremljena u novoj zgradi općinske administracije.

Sala je simbolično otvorena neposredno pred početak ove sjednice.